

trincke darnon/das ist alten vnd jungen ein wunder
grosse hülffe/welcherlay gebrechen es ist der augen.

Ein anders.

Nym das holtz da erbese an wachsen/thu die öbern
rinden herab/die andere darnach bis auff das holtz/
nym vnd brenn wasser daraus/vnd die selbig rinde ist
gelfarb/das wasser thu ynn die augen/vnd ist gut für
alle gebrechen/vber nacht hilfft es dich.

Ein anders für tuncckel augen.

Nym Bethonien vnd welle es ynn wasser/trincks
fast/es treibt das vngesund blut von den augen.

Item/Celidonien wurtz/zerreibs vnd trayffs ynn die
augen. Item/Centauream zumale vnd temperiers
mit hönigsam/vnd salb die augen damit.

Nota/Sieben gute Kreuter zu den augen.

Bethonica/Eisenkraut/Augentrost/Schelwurtz/
Wasenampffer/Fenchel vnd Kauten.

Ein puluer zu machen das man braucht
ynn der speise/gar edel zum gesicht.

Nym Fenchelsamen.ij.quinten/ Lufragie/Sileris
montani/Maijorani/Serpilli/eins iglichen.j.quinten
Zuckers ij. quinten/Pfeffer ein halb quinten/Grano=
rum paradisi ein quinten/Croci ein halb quinten/dar=
aus wird ein puluer/vnd nym sein offft ein wenig.

Fehl zuuertreiben ynn augen.

Nym weis Bibergeil/vnd brich die entzwey/so fin
destu ein weis ynn der mitten/nymis ynn die hand/zu
reibs wol mit wein/vnd trayffs ynn die augen/es zu=
bricht die fehle.

Für grosse schüsse ynn augen odder zeenen.

Nym Pfeffer/Weirach vnd gebraten Ponnen/pül=
uer das zusammen/vnd temperiers mit eyerweis/strei
chs auff ein tuch vnd legs an die schlaff adern/odder
an den packen.

B ij Ein gut